

玉機微義卷之六

吳陵劉純宗厚輯

後學

孫猷元方

校

沈廷颺佩游

泄瀉門

宜與滯下門參看

瀉痢生死脉法

內經云脉細皮寒少氣泄利前後飲食不入是謂五
虛死其漿粥入胃泄注止則虛者活

脉經云洩注脉緩時小結者生浮大數者死又洞洩
食不化不得留下膿血脉微小流連者生緊急者死

脉訣云下痢微小卽爲生脉大浮洪無瘥日

仲景治痢大法

東垣治痢大法

並見滯下門

瀉分寒熱

病機機要云臟腑瀉利其證多種大抵從風濕熱論
是知寒少熱多寒則不能久也故曰暴瀉非陽久瀉
非陰大便完穀不化有寒有熱熱者脉疾身多動音
聲響亮暴注下迫此陽也寒者脉沉而細身不動作
目睛不了了飲食不下鼻準氣息者薑附湯主之若
身重四肢不舉朮附湯主之

按此以瀉之久暴分陰陽正如傷寒之病始爲寒而終則傳變爲熱也然亦必以脉證參訂焉

原病式曰瀉白爲寒青黃紅赤黑皆以爲熱也大抵瀉利小便清白不澁爲寒赤澁者爲熱又完穀不化而色不變吐利腥穢澄澈清冷小便清白不澁身凉不渴脉遲細而微者寒也穀雖不化而色變非白煩渴小便赤澁者熱證也凡穀消化無問其色及他證便爲熱也寒泄而穀消化者未之有也或火性急速傳化失常穀雖不化而殮泄者亦有之矣仲景云邪熱不殺穀然熱得濕則殮泄也

論瀉痢在濕有熱有風有寒

機要云有太陰經受濕而爲水泄虛滑身重微滿不知穀味久則防變而爲膿血脾經傳腎謂之賊邪故難愈若先利而後滑謂之微邪故易痊此皆脾土受濕之所爲也

有厥陰經下利不止其脉沉而遲手足厥逆涕唾膿血此難治宜麻黃湯小續命汗之此有表邪縮於內當瀉表邪而愈

有暴下無聲身冷自汗小便自利大便不禁氣難布

息脉微嘔吐急以重藥溫之漿水散是也

論暴注屬火

子和云夫暴注瀉水不已內經曰注下也注下水利也暴速甚者屬火宜用水調桂苓甘露飲五苓益元散或以長流水煎放冷服涼膈通聖亦能治之慎不可驟用罌粟殼乾薑豆蔻之類縱瀉止亦轉生他疾止可分陰陽利水道而已

按已上論所辨寒熱風濕火等證所以明六淫之邪皆能爲瀉爲注者亦當各隨所淫之邪分而治之可也

論胃氣下降爲殮泄

機要云夫脾胃同濕土之化主腐熟水穀胃氣和平飲食入胃精氣則輸於脾上歸於肺行於百脉而成榮衛若飲食一傷起居不時損其胃氣則上升精華之氣反下降是爲殮泄久則太陰傳少陰而爲腸澼論春傷於風夏必殮泄

機要云春宜緩形形緩動則肝木乃榮反靜密則是行秋令金能制木風氣內藏夏至則火盛而金去獨火木旺而脾土損矣輕則殮泄所泄穀不化重則下

利膿血稠粘良方云經云春傷於風夏必殮泄蓋風喜傷肝春時木旺不受邪反移氣剋於脾土脾既受剋不能運化因成積滯夏秋之間再感暑濕風冷之氣發動而成利也

論殮泄屬風宜汗

子和云殮泄不止完穀不化發汗可也桂枝麻黃湯主之此證以風爲根蓋風隨汗出也

按殮泄證機要謂胃氣下流及春行秋令良方謂春木旺移氣剋脾二論雖殊要之皆因風木傳變而脾土受邪爾子和謂風隨汗解此論固是然亦須隱其傳變而治不可執此一法也

瀉分三四

三因嚴氏云泄瀉一證經中所謂洞泄殄泄溏泄溢泄濡泄米穀注下是也所因有內外不內外差殊耳經云春傷於風夏必殄泄又云濕勝則濡泄寒甚則爲泄暑熱盛亦爲泄至於七情感動臟氣不和亦致溏泄他如飲食不節過食生冷而成泄瀉者乃脾胃有傷也但停滯泄瀉一證直須積滯已消然後用斷下藥今人往往便固止之多成痢疾者矣治法先理中焦次分利水穀治中不效然後斷下

按此三因所分甚詳但外所淫者既六而立方止有其二內之七情爲證而又不詳及於治法

治瀉利用吐下汗三法

子和云一僧臟腑不調三年不效此洞泄也以謀慮不決而成肝主謀慮甚則乘脾脾濕不流乃上涌痰半盆又以舟車丸濬川散下數行仍使澡浴出汗自爾日勝一日常以胃風湯白朮散調養之

按子和爲治大率多用此三法但洞泄一證縱使果有積滯鬱結之甚元氣壯實者亦不宜驟用之况有積滯雖甚而元氣尤虛者哉設使果當用此三法亦宜如仲景察證以辨其吐汗下者有不可之殊况仲景治利又有合下合溫之法焉此得非孟浪乎

丹溪論局方用熱藥瀉藥治利之誤

見滯下門

謹按泄瀉一證古方率以爲腸胃虛寒與風冷乘之爲論故多行瀉熱之劑彼瀉利者豈無積滯豈無熱證乎今觀病機機要所論有屬寒屬風屬濕屬火之證此因於外而傷者也又云厥陰經動并胃氣下降爲瀉利三因所言七情感動臟氣不平亦致溏泄此則因於內而傷者也外則當調六氣內則當平五臟况又有飲食所傷腸胃停滯所致者治法各不同也然更有因胃氣下流而泄者在法則當升舉因風而成殮泄者則當解散因痰積於上焦以致大腸之不固而泄者又當去上焦之痰而不治其瀉因脾胃氣虛而泄者又當補中益氣使胃氣升騰而泄自止蓋各求其本而治可也

泄瀉治法

治濕之劑

機要白朮芍藥湯治太陰脾經受濕水泄注下體重
微滿困弱無力不欲飲食暴泄無數水穀不化宜
此湯和之

白朮

芍藥

各一兩

甘草

五錢

每服一兩水煎服

治濕瀉茯苓湯

又治食瀉濕熱

白朮

茯苓

各七錢五分

右咀每服一兩水煎食前服一方有芍藥三味等
分名白朮散

按已上二方和中除濕足太陰陽明經藥也白朮之甘入胃而除脾胃之濕芍藥之酸澀除胃中之濕熱四肢困倦茯苓利水道而除濕此三味泄利須用之藥也

蒼朮芍藥湯治證如前

蒼朮 二兩

芍藥 一兩

黃芩 五錢

右剉每服一兩加淡味桂五分煎服

按此解散濕熱上中二焦之劑太陰經的藥也

良方胃苓湯治夏秋之間脾胃傷冷水穀不分泄瀉不止

五苓散

平胃散

合和薑棗煎空心服

按此乃表裏除濕之劑東垣所謂上下分消其濕是也太陽太陰經藥出陽明飲痞例

仲景五苓散 宣明益元散 方並見濕劑

按以上二方除濕利小便之劑太陽經的藥也

治風之劑

機要防風芍藥湯治泄利殮泄身熱脉弦腹痛而渴

及頭痛微汗

防風

芍藥

黃芩 各一兩

右咀每服五錢水煎服

按此治風辛涼之劑太陰太陽經藥也

蒼朮防風治泄利脉弦頭微痛

蒼朮 二兩

防風 一兩

一方蒼朮四兩麻黃一兩防風五錢薑七片煎

按此足太陰陽明經藥也

良方神朮散治春傷於風夏必殭泄

蒼朮 一斤

藁朮

川芎 各六兩

羌活 四兩

粉草

細辛 各一兩六錢

右爲粗末每服三錢薑三片煎要出汗加葱白

按已上三方治風勝濕辛溫之劑太陽經藥也

局方胃風湯治大人小兒風冷乘虛入客腸胃水穀

不化泄瀉注下

方見滯下門

按此方名曰治風其實和血之藥也

治熱之劑

局方戊己丸治脾胃濕熱泄利不止

方見滯下門

按泄瀉局方多以爲寒至劉張始言有屬熱屬火之證故諸方中治熱瀉之方甚少然仲景治傷寒挾熱下利用葛根黃芩黃連湯但人未之思耳

治暑之劑

局方來復丹治伏暑泄瀉如水

方見暑門

易簡云硝石性寒佐以陳皮其性踈快硫黃且能
利人若作煖藥以止瀉誤矣蓋由啖食生冷或冒
暑熱之氣中脘閉結揮霍變亂此
藥通利三焦分理陰陽服之甚驗

按此出厥陰

硫黃例藥也

香薷飲治伏暑吐瀉

方見暑門

按此治暑之表藥肺脾
經藥也出太陰厚朴例

宣明桂苓甘露飲治飲水不消嘔吐瀉利或下利赤

白
方見暑門

按五苓散益元散加寒水
石解利濕熱太陽經藥也

治寒之劑

機要漿水散治暴瀉如水周身汗出一身盡冷脉微而弱氣少不能語甚者加吐此爲急病

半夏 二兩 湯洗

附子 炮

乾薑

桂

甘草 炙各五錢

良薑 二錢五分

右爲細末每服三五錢漿水二盞煎至半盞和滓

熱服

白朮湯

白朮

芍藥

甘草 炙各三錢

乾薑 五錢 炮